



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 6

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

Amit Shah-i yakta Manipur semdangtsü

Russian army nem Bakhmut agütsü tenzükogo: Wagner



VOL. XX NO. 223 (ADOK 223) DIMAPUR ROGONÜ (FRIDAY)

MONUPII (MAY) 26, 2023

₹ 5.00

Advisor H. Sethrongkyu-i union minister tem ajuru

Kohima, Monupii/May 25 (TYO): Nagaland nungi Advisor, IT & Communication, Economic & Statistics, Evaluation, H. Sethrongkyu Sangtam-i tang mezüngbuba sorkar tenüing nung New Delhi semdanga union minister tem ajuru liasü.

Pai Union Minister of State for Entrepreneurship Skill Development, Electronics and Technology, Rajeev Chandrasekhar aser Minister of State for Minority Affairs, John Barla ajuru liasü.

Iba mapang Nagaland nung IT sector indang jembia liasü, koba terenlok lir saka jila aser yimdak-yimtsüngtem nung tajangzük kangabo mangur, aser state nung aliba resources tem amshia technology rendaktsütsü asoshi lenmang tem bushitsü jembia liasü, ta sangdong ka ajanga ashi.

Nagaland nung Information Technology tajungba kuma melenshidaktsütsü asoshi yaritsü aser ajungmesotsü renema lir ta Chandrasekhar-i iba mapang langzua liasü.

Advisor Sethrongkyu ya Tuensang district kübok 52 Longkhim-Chare AC nungi lir aser Centre indang scheme balala ajanga Nagaland nung IT sector nung terenlok bener arutsü pa teimla lir.

Technology ajanga jila aser yimdak-yimtsüngtem nung temelenshi tulu bener arutsü aser state nung technology tsütsü dangar dak metaloka malitsü pa teimla lir.

Advisor Sethrongkyu meina Additional Director of IT & Communication Sabou Yashu aser BJP Nagaland indang spokesperson Pintu M Ghose nungertem oa liasü.

Manipur nung azüdokshi tangsa anentsüla: NSCN/GPRN

Dimapur, Monupii/May 25 (TYO): Meitei aser Kuki nunger tsüingta tang mepetmesü adoka aliba ya kanga tesempatsü mapa lir, kong meimchir aliba tesem (yimtsüng) amakba ya nüchünilem mapa masü, tekülem ki rongdoktsüba ya tamangba yimsü mezüngmeshiba lir aser item ajak ya meimchir temeden anema inyakba lir, ta NSCN/GPRN sangdong ka ajanga ashi.

Aimol, Chiru, Chothe, Kharam, Koireng aser Kom nungertem ya Naga kin ama züngshia arur aser India aser Myanmar nungi nüchiso angutsü nukjidong yua aliba nung takok mangu tashi Naga yimtenren asoshi nokdakba

nung parnoki tongti shilem agia arur, ta National Socialist Council of Nagalim (NSCN) ajanga ashi.

Asen Meitei aser Kuki adianur temi mashi mangatetsüla aser kecha yimya nunga memerenshitsu. Kom nunger Kangathei yimtsüng ka Kuki telungpuri amakba aser yangji alirtem ainshidaktsüba ya tesasatsü mapa lir, ta sangdong ajanga ashi. Iba ama azüdokshi yagi tensa ang tamajungba akumtsü, anungji meimchir tenüing nung aser kati ka den yimjung nung alitsü mechi tangsa item mapa tamajung inyakba anentsüla, ta NSCN/GPRN sangdong ajanga ashi.

Chiyongtsü tamajung bener aruba azüoktsüla: Kikheto

Dimapur, Monupii/May 25 (TYO): FDA Bhawan, New Delhi nung May 25, 2023 nü Central Advisory Committee FSSAI indang 40 buba National Meeting nung adendang, State Food Safety Commissioner Y. KikhetoSema, IAS ajanga ashiba agi, FSSAI ajanga FSS Act, 2006 indang Section 43 kübok food certification aser NABL ajanga global standard ISO/IEC 17025:2017 nung ama accredited asüba state nung chemical tendangba laboratory ka dang lir aser ibaji Kohima nung 1983 küm amenokba State Public Health Laboratory ya dang lir, ta ashi.

Meta talang nungi lenmang tesendaktep majungba aser lisa majungba ajanga chiyongtsü samples yokba aser agizükba nung tetsükdaktsü tulu ajurur, anungji tapet mera agitsü menudaktsür, ta pai ashi.

Nagaland ya Myanmar den international boundary talang lir, anungji chiyongtsü tamajung, brand meshidak aser sub-standard chiyongtsü tem Nagaland-i bener aiter, koba tekeraba nung azüoktsü nungdaker, ta Sema-i ashi.

FSSAI, Ministry of H&FW ajanga tanen makai yariba asoshi pelaba lemsatepdang ano state nung Food Safety tajungtiba nung mapa kuma inyaktsü asoshi Basic Food Laboratory amenok nung ajungtsü, ta Kikheto-i ashi.

Paisa Modified Food Safety on Wheels (MFSW) ie, tetetzü Food Testing Mobile Van pongu meshia liasü, kechiaser tang aliba MFSWs asem yagi state mayimjemer, ta ashi.

State Food Safety Commissioner ya meina iba senden nung State Programme Officer, Food Safety, Dr. John Kemp dena liasü.

Temesepba mozü shibelener kati TASU lenir ka tepset; Tizit tensa majung lir



(Abelen) Late Ahoa Konyak aser (Achiji) rongdoktsüba noksa nung angur.

Kohima, Monupii/May 25 (TYO): Mon district kübok Tizit nung temesepba mozü shibelener kati Brehostibarnü Tizit Area Students Union (TASU) indang Action Committee chairman Ahoa Konyak lepsset.

Ahoa Konyak tepssetsang ya Kapnyei'er jabaso Meshan Konyak ta jangjaogo.

Tizit town kübok Pentom colony nung Meshan Konyak temesepba mozü ayokba osang angazüka TASU ketdangsur temi anepdang 8:00 ako meta par ki mita aoba mapang iba lendong ya ataloka liasü.

Par ki mita bushiba mapang tai tonglokja alisangi nok agi Ahoa Konyak ya lepsset.

Osang ajanga ashiba agi, iba mapa tamajung inyak ta tai tonglokja alisangi-i Tizit nung aliba police matsüingdang bendanga agütsü aser pa apu.

Iba osang temai adokba sülen nüburtem ain adoka arua iba nisungbar ki nung mi senloktsü.

Tizit nung police ketdangsur kati ashiba agi, Ahoa Konyak-i anir TASU nungi team kati temolung melema aliba ki ka nung temesepba mozü ajungbena mita bushiba mapang ki kiburi pa yangji nok agi lepsset ta parnok dangi anepdang 9:30 ako meta osang angazük.

Iba sülen tensa mejungi akum, saka tang tensa azüoka lir, ta police-i ashi.

Action Committee chairman duty nung lia tepsetba mang yima TASU ajanga Tizit kübok aliba nüburtem dang Hokulbarnü tashi ghonda 24 shutter shibangtsü asüingdanga liasü.

TASU tir Yanphong Konyak aser tongti zülur Nokmao Konyak nati ashiba agi, nüburtem kumzuka ayutsü mechi iba tenokdangba ya agütsütsüsa akum.

Iba tatalokba indang ajunga kanga junga bushisüingdangba mapang lir, ta police ajanga ashi.

Ahoa Konyak asüba asoshi taoksa aser tejashi lemsatepba mapang Minister, Health & Family Welfare, P. Paiwang Konyak-i iba mapa tamajung khukhua aitsü aser ozüing amshirtem dang ochishia bushisüingdang sür memonui asür kibong nem ochi obendang agütsütsü ajungshia liasü.

Ahoa Konyak ya lanur tajung ka liasü aser kaketshir ajungtsü asoshi bendanga agütsür tasü ita nokdak aser pai kaketshir asoshi bendanga agütsüba kodanga mamadoktsü, ta Minister Paiwang-i ashi.

Pa asüba ajanga Tizit nung

kaketshirtem aser Konyak nunger asoshi lenir tajung ka samaogo aser pa asüba ajanga tawa adokba asüingtsü tasak asütsü, ta Minister-i ashi.

Paisa mangyimer kibong den asükhü lemsatepa liasü.

Temesepba mozü shibelener kati Ahoa Konyak tepsetba asoshi temolung korema jashiba lemsateper, ta Naga Students' Federation (NSF) ajanga ashi.

Temesepba mozü tebilemstü mittsü asoshi 'official duty' nung lia kaketshir lenir ka takum agiba ya onoki tematiba jenjang nung aitsür, ta NSF tir Kegwayhun Tep-i sangdong ka nung ashi.

Aibelener nem tapet temerenshi agütsütsüla aser tanü lanurtem aser Naga nunger menentsüba temesepba mozü aser danga osettsüset azüoktsü asoshi tekeratiba nung ketdangsur temi mera agitsüla, ta sangdong ajanga ashi.

NSF ajanga mangyimer kibong den asükhü lemsateper aser TASU ajanga lokti menentsüba tashidak anema rara tajung raraba atema tenüingsang agütsür, ta ashi.

Asür tanüla teti tatem maka tesunep nung anisüingzükjang ta sarasademtsür, ta NSF ajangasa ashi.

(Maneni tapak 2 nung...)

Manipur nung tensa tajungba makumer, nisung ka tepset

Imphal, Monupii/May 25 (Agencies): Manipur kübok lendong timtem tulu ajuru aliba Bishnupur arrtsülen aser Churachandpur tesem nung temolung meleteti aliba telungpur aser nisung telok ka tsüingta raratepba mapang nisung ka tepset, ta police temi Brehostibarnü ashi.

Tawa Churachandpur nung kin balala tsüingta mepetmesü adokba ajanga tesem balala nung jenoka alir aser ano Bishnupur kübok Moirang nung aliba relief camp ka nung jenoka alirtem dak Bodhbarnü telungpur temi injang khaloktsüba mapang arishi küm 30 tain Toijam Chandramoni khaser aser arishi küm 22 tain Leichombam Abungnao yirua liasü, ta ashi.

Bishnupur district kübok

Toronglaobi nung yimdaklir kar indang ki nung telungpur temi Mongulbar aonung mi senloktsü ta osang kar liasü.

"Ki rongtsüba ajanga yimdaklir aser Moirang camp nung alirtem jashi. Item telungpur temi Bishnupur kübok Thamnapokpi aser Churachandpur kübok Kanganthei anasa aliba school ka nung mi senloktsütsü akok ta nüburtemi meteta parnok iba tesem bushia ao."

"Parnok iba tesem atongdang telungpur temi parnok dak injang khalokja nisung ana yirutsü. Tena ya mozü kidangi anir aodang ka iba zübu agi asü," ta senior police officer kati ashi.

Iba lendong atalokba sülen ketdangsur temi yangji ghonda 24 atema curfew benok aser danga district tem nung curfew

salaba mapang ajemja liasü.

Bodhbarnü nisung telok kati Bishnupur district kübok Manipur PWD Minister Konthoujam Govindas'er ki raksatsü aser mepetmesü adoka aliba state nung sorkari telungpur ket nungi nüburtem kumzuka ayutsü asoshi peria meinyaker ta aija liasü.

Minister Govindas ya BJP lenir ka lir aser par ki raksatsüba mapang par kinungertem kidang meliasü, ajisüaka tetsür timba sür telok kati Ningthoukhong area nung ki aser yangji aliba osettsüset raksaja liasü.

Hopa asem tejakdang Meitei aser Kuki kin tsüingta rongrong tenzüker minister ki raksatsüba tang ya mezüngbuba alitsü.

State nung tensa azüoktsü asoshi army aser paramilitary forces tem yoka lir.

Surveillance Workers tem atema training sentong ayongzüka agi



Surveillance Workers tem atema training sentong ayongzüka agidang tangokba noksa angur.

Dimapur, Monupii/May 25 (TYO): National Centre for Vector Borne Diseases Control (NCVBDC), Directorate of Health & Family Welfare Kohima, Nagaland-i ayongzüka Surveillance Workers (SW) tasentem atema May 23 nungi 25 tashi DUDA Guest House, Conference Hall, Kohima nung training sentong ka katsüogo.

Joint Director and SPO, NCVBDC, Dr. Neisakho Kere-i, Surveillance Workers tem ajak sentong nung shilem agitsü asoshi pelashishia agizük aser pei mapa nendaka inyaksü koda tongtibang iba indang lemsatepa liasü. Dr. Kere-i, Malaria, Dengue, JE, Filariasis, Chikungunya aser Kala Azar amala Vector Borne Diseases

tem indang tongmelang tangazükba aser mapa inyakertem tinyaktsü aser khuret indang lemsatepa liasü.

Sentong nungsa Deputy Director, NCVBDC Dr. Tinurenla Anichari-i, Malaria, JE, dengue tashidak temaitsü aser symptom tem indang metetdaksüba den Malaria koda anepalutsü iba indang osang tejangja agüja liasü.

Maneni sentong nung State Consultant, Public Health & Training, NCVBDC, Imsubenla-i Malaria Formats recording & reporting indang metetdaksü aser iba sülen format tem fill up asüba aser IEC/BCC activities aser LLIN amshiba yimya indang tangazükba agüja liasü.

State Consultant, M&E N g a n n e n m o n g b a - i , Surveillance Worker tem nem monthly performance reporting formats indang tangazükba agütsü aser SW temi report agütsüba indang lemsatepa liasü.

Kasa mapang nung Surveillance Workers tem Rusoma HWC semdangtsü anir oa liasü. Health facilities tem nung records aser documents balala achaayanga ayuba indang tsüngtong oa tangazükba agütsütsü nükjiding nung parnok iba facility yagi anir ao.

Lab Technician Ameri-i, Blood Slide renemba, safe practices aser RDT Kit test aser result koda agütsütsü iba indang sayua liasü.

Dimapur nung mejangjaba tasü mang ka nguteta lir

Dimapur, Monupii/May 25 (TYO): April 25 nü 3:30 ako shi nung from Station Manager, NF Railway Dimapur-i, Km 253/2-3 nung RXR-DMV tsüngda nisung ka longdaka aliba indang osang agütsü.

Iba sülen GRPS duty party-i tesemi aritepa ao aser mejangjaba non-local tebur tasü mang ka nguteta liasü. Pa

ya arishi küm 40 shi liasü aser train-i menü ng asütsü ta temulung melemi bilemer.

Temzüng ozü ng kübok tinyaktsü maparentem ajak tembanga inyakba sülen tasü mang ya District Hospital morgue-i post-mortem examination aser identification atema benerogo.

Asü sang yagi long pant

tanak, T-shirt tanak aser coffee sentsü telung süoshi ka semer liasü. Asü sang dak pa teka tapelen nung Raj Kumar Sharma aser Onita Devi ta nisung ana tenü ng ajenoka lir.

Asü r kinunger aser medemertem dang Officer-in-Charge, GRPS, Dimapur (Mobile No. 7085055021) den tongteprateptsü asoshi mepeshia metetdaksüogo.

Clean Mokokchung Campaign-i achaayanga RRR centre amenokogo



Dimapur, Monupii/May 25 (TYO): Mokokchung Municipal Council kübok Clean Mokokchung Campaign-i achaayanga "Meri life Mera swachh shehar Campaign" scheme kübok RRR (Reduce, Reuse and Recycle) Centre ka Imlong Place, Mokokchung nung

amenokogo.

Iba inyakyim kübok members volunteer temi Mokokchung jila nung süoshi, ki oset, Tv, yangku, tsüngsem aser chipu anopu amala osettem bendena Imlong Place nung saya aser nüngdaka aliba nüburtemi item osettem angati agi benero go.

Iba inyakyim ya May 23 nü tenzü k aser maneni June 5 tashi benoka inyaksangshitsü. Iba sentong ayongertemi Mokokchung nung aliba nüburtem dang tejakdangi arua parnoki mamshiba osettsütem tenla agütsütsü asoshi ayongzü kogo.

New Model College amentetba asoshi kaketshirtemi tenüngsang agütsür

Mokokchung, May 25 (TYO): Talangka nungi aginüba ka atalokja Mangkolemba Town nung Govt. College ka amenoktetba asoshi Nagaland Chief Minister, Neiphu Rio-i aniba PDA sorkar den department of Higher Education aser Higher Education Minister, Temjen Imna Along parnok ajak dang kanga pelar, ta Jangpetkong Kaketshir Telongjem Mungdang tir – Alemsashi, Japukong Kaketshir Mungdang tir – Watinungsang aser Tzü rangkong Kaketshir

Mungdang tir – Imlisunep par asemei yokba sangdong ka ajanga metetdaksü.

Mangkolemba nung iba New Model College amenokba ajanga tarutsü nung yangi nungi tashitawar, shisashir aser lenir jenti adoktsü imlar. Iba rijü ajanga tarutsü putu asen lima taginüba aser nükjiding ataloktsü onoki sarasademtsür, aser iba college tejakleni tashi itta aotsü asoshi onokia teti khuret abentsü, ta JKTm, JKM aser TKM ketdangpurtemisa metetdaksü.

Dimapur Press Club ketdangpur tasen shimogo

Dimapur, Monupii/May 25 (TYO): Dimapur Press Club (DPC) pur lokti senden ka Press Point, Dimapur nung May 25, 2023 nü amendang ketdangpur tasen shima liasü.

Team tasenba nung president Temjenrenba Anichar alitsü, vice president Honikali Lohi, general secretary Akangjungla, joint secretaries Prasanjit Dutta aser Likivi Kappo, information & publicity secretary Kanili

Kiho, finance secretary Asungba Ao, treasurer Dilip Sharma nung den executive zü ngsem Paudi Renta, Moa Longkumer aser Imkong Walling alitsü.

Kasa senden nung zü ngsem tenü ng zülüokba maparen tenzü ktsü lemtet aser zü ngsem tasenpur dan sen 300 aser tejenpur dang 250 meshitsü lemteta liasü. Registration atema June 10, 2023 ya anogo tatem asütsü.

Tsumok ayong apu nung gari senzütsü memelar

Dimapur, Monupii/May 25 (TYO): Tsunsangra nungi Impur tsüngda (8.4 km) Tsumok ayong nung apu indang RCC deck slab shilem ka raksar aliba osang angazükba sülen Tuli District Administration den Police Department PWD feeder road division Tuli aser Asangma Village Council-i iba apu asadanga liasü.

Apu asadanga sülen lendong balala ataloktsü aliba nungi jenboa alitsü asoshi ADC Tuli-i, apu yanglushitsü atema May 24 nungi June 6 tashi iba apu adena gari kecha senzüsenpong masütsü asoshi tenokdangba agütsüogo. Iba tetuyuba ya ajaki tashi anga anidakdaksütsü asoshi agütsüogo.

Mokokchung DC-i metetdaksür

Dimapur, Monupii/May 25 (TYO): Mokokchung DC-i sangdong ka ajanga ADC Tuli/ Manglokemba, SDO (C) Changtongya, Border Magistrate, Tsurangkong, EAC Ongpangkong, Kubolong, Chuchuyimlang, Alongkima, Merangmen aser Longjem nem May 1, 2023 nü nungi tenzüka Mokokchung, Nagaland State Transport (NST), Yimyu

(Khensa) ISBT nungi inyaksangshiba metetdaksüogo. Iba dak sendakba nung temalen shisema aliba ketdangsürtem dang pei tawabangba kübok aliba nüburtem nem osang tejangja agütsütsü asoshi DC-isa metetdaksüogo, ta Mokokchung Sub-Divisional Officer (C) Shelley Katiry-i sangdong ka ajanga metetdaksü.

Temesepba mozü shibelener... (TAPAK 1 NUNGI...)

Pentom ward, Tizit town nung Kapnyei'er jabaso Menshan Konyak-i Ahoa Konyak tepsetba osang angashia kanga süngmanger aser aoksar, ta Konyak Students' Union ajanga sangdong ka nung ashi.

Tanü tendak civil society aser sorkar jenjang nunga kanga bulua jembiba aser tebilemstü tulutibaji yi aser temesepba mozü indang ya lir, ta ashi.

District nung temesepba mozü samatsütsü ya KSU indang nükjiding lir.

KSU pangzü ng nung ajemdaker mapang shia tesem balala mita aor aser kaketshir tentet ka asünung aginüba ama nükjiding tongtettsü asoshi

nü ngdakba hadir, nübu mesüra legal tsütsü teyari peria mali.

Temesepba mozü nokdangtsü asoshi sorkari mera balala agiba tanü tashi tasü ama lir, aser tanü atalokba ya Konyak nung asoshi tajaba ola ka amai lir aser sorkar tekong meranga lira union-i ozü sasep nung mera agitsüsa akumtsü, ta KSU ajanga ashi.

Iba dak sendakba nung koda masüba kar atalokra sorkar khuret asütsü, ta ashi.

Meimchi molungsentsü agi magizüktettsüsa iba ama mapa tamajung inyakba khukhua aitsü aser ozü ng amshirtem dang aibelener nem ozü ng agi mela aliba ama tapet temerenshi agütsütsü akhanger, ta KSU ajangasa ashi.



May 25, 2023 nü Khunti nung Union Ministry of Tribal Affairs-i ayongzükba Women's Self Help Group Conference nung Tir, Droupadi Murmu, Jharkhand Governor C.P. Radhakrishna, Union Tribal Affairs Minister Arjun Munda aser Jharkhand Chief Minister Hemant Soren nunger tangokba noksa nung angur.

Cong-i MP, Rajasthan, Chhattisgarh elections atema asalentong yanglutsü

New Delhi, May 25

(Agencies): Tawa Congress-i Karnataka assembly elections nung takok tulu anguba sülen maneni Madhya Pradesh, Rajasthan aser Chhattisgarh state tem nung assembly elections atema party terenemshiba asadanga den külemi asalentong yanglutsü atema Hokolbar nungi tenzuka anogo ananü senden amentsü.

Osang angazükba agi, May 26 nü Madhya Pradesh Congress unit aser Rajasthan Congress unit senden balala amentsü aser May 26 nü Chhattisgarh nunga party senden amentsü.

Item senden nung election atema asalentong yanglur mongin, Sunil Kanugolu densema state lenirtemi election atema terenemshiba jenjang

asadangtsü.

Tang Rajasthan aser Chhattisgarh na nung Congress sorkar lir aser Madhya Pradesh nung BJP sorkar lir. Taoba mapang Congress lenir, Jyotiraditya Scindia leniba nung Congress MLA kari BJP nung adenba ajanga MP nung Congress sorkar chirepa liasü.

Taküm küm tatembanglen state pongu- Rajasthan, Madhya Pradesh, Chhattisgarh, Telangana aser Mizoram nung assembly elections agitsü lia tawa Karnataka election nung Congress-i takok tulu anguba ajanga party nung inyakertem ajungmesoogo.

Congress Tir, Mallikarjun Kharge-i item state nung party lenirtem den jurila senden amentsü aser senden nungji senden Rajasthan aser

Chhattisgarh nungi chief minister ana, state unit Tirtem aser tongti lenirtem adentsü.

Tang state aika nung Congress party telung nung mangatettep adoka lir

Tang Rajasthan nung chief minister Ashok Gehlot aser taoba mapang pa deputy Sachin Pilot na tsüngda mangatettep adoka lir aser Chhattisgarh nung chief minister Bhupesh Baghel aser state minister T S SinghDeo na tsüngda mangatettep lir.

Madhya Pradesh nunga taoba mapang chief minister Kamal Nath aser party lenir tain Digvijaya Singh na tsüngda mangatettep lir. Iba dak alia Telangana nunga party lenirtem kari state Congress Tir Revanth Reddy ya tangar, ta shia pa anema nokdaker.

Taoba mapang Karnataka DGP Sood-i CBI director mapa agizükogo

New Delhi, May 25

(Agencies): Taoba mapang Karnataka nung DGP, Praveen Sood-i Brihostibarnü Central Bureau of Investigation (CBI) Director mapa agizükogo.

CBI Director Subodh Jaiswal kümsük May 25 nü tembangba sülen Sood-i pa melenzüker.

High powered committee senden nung pa CBI Director shim. Iba committee nung züngsem asemji Ato kilonser Narendra Modi, Chief Justice of India DY Chandrachud aser Opposition lenir, Adhir Ranjan Chowdhury nunger lir.

Ajisüaka senden nungji Congress lenir Adhir Ranjan Chowdhury-ibo CBI Director menden atema Praveen Sood tenüng benokbaji ashishia liasü, ta osang angazükker.

2013-14 küm Praveen Sood-i Karnataka State Police Housing Corporation nung Managing Director inyaka liasü. Paisa state home department nung Principal Secretary inyak,

Karnataka State Reserve Police nung ADGP aser Administration nung ADGP inyaka liasü.

Karnataka nung assembly election agitsü lia taküm March ita nung Karnataka nung Congress lenir DK Shivakumar-i, state nung Praveen Sood-i BJP pusema inyaker aser pa DGP inyakba mapang nung pai Congress lenirtem anema ken o 25 benok saka BJP lenirtem anemabo ken o ka danga mebenok, ta aija liasü.

Shivakumar-isa, Congress-i sorkar kümra pai DGP Praveen Sood anema inyaksü, ta jembia liasü.

Karnataka nung Sood melen Dr Alok Mohan DGP shima mapa agizükogo.

Osangbener den jembidang Alok Mohan-i, "Bengaluru yimti ya temesepba mozü khenyongi mamshiba state ka kümdaktsütsü onok nükjidong lir. Ozüng alema inyakba mapatem khenyongi magizüktsütsü," ta metetdakja liasü.

PM Modi-i linük asem semdangba sülen meyipa aruogo



New Delhi, May 25, 2023: Ato kilonser, Narendra Modi-i Japan, Papua New Guinea aser Australia linüktem semdangba sülen Brihostibarnü Airport tonga arudang pa agizükba noksa nung angur.

New Delhi, Monupii/May 25

(Agencies): Ato kilonser, Narendra Modi-i Japan, Papua New Guinea aser Australia linüktem semdanga senden aika nung adenba sülen Brihostibarnü Delhi nung aliba Palam airport tonga aruogo.

Pa airport tonga arudang BJP National Tir, JP Nadda-i pa nem narozük azüktsü. Airport nungji Nadda den Minister of State (MoS) External Affairs Meenakshi Lekhi, taoba mapang Union Minister Harsh Vardhan, Delhi MP Ramesh Vidhuri aser Delhi Assembly nung Opposition Lenir, Ramvir Singh Bidhuri nungera liasü.

Osangbenertem den jembidang party nung inyakertemi, "PM Modi agizüktsü atema yangi lokti adenshia lir, kechiyong pa ajanga linük nüburttem nüma tangdaktsüogo," ta ashi.

Ato kilonser Modi-i anogo asemnü Australia semdangba mapang nung Australia Ato kilonser, Anthony Albanese den senden amen aser Australia

nung aliba sensotem den-a sentong tuluka ayongzuka agiogo. Paisa Australia nung business lenirtem aika ajuru.

Modi-i twitter ajanga, "PM @AlboMP den senden takok ngua amen, sensotem den sentong tajung agi, business lenirtem ajuru aser Australia nunger lenla balala nung nüngtugu nisungtem ajuruogo. Iba linük semdangba ya kanga tongtibang liasü, aser iba ya ajanga Australia aser India na tsüngda tesendaktep tajungba akümtsü," ta metetdaktsü.

Papua New Guinea semdangba mapang nung Hombarnü Modi aser Papua New Guinea Ato kilonser, James Marape na leniba nung 3buba India-Pacific Islands Cooperation (FIPIC) senden amen. Tang mezüng India nunger Ato kilonser kati asetkong linük ya semdangogo.

Iba jakdang Modi-i Japan semdanga Hiroshima yimti nung ayongzükba G7 senden nung shilem agia liasü. Hiroshima nungsa pai Quad senden nung shilem agia aden.

Tir nem Parliament ki semzükdaktsütsü mepishiba ken o ka benok

New Delhi, May 25

(Agencies): Parliament building tasenba semzüktsü aliba dak sendakba nung mangatettep adoka aliba mapang nung Supreme Court nung ken o (PIL) ka benokogo.

Parliament building tasenba ya linük Tir nem semzükdaktsütsü atema Lok Sabha Secretariat aser Centre sorkar dang tuyutsüla, ta mepishia Supreme Court nung ken o benok.

Temepishiba ken oji Supreme Court lawyer, CR Jaya Sukin-i benok.

PIL nungji yamai shia lir,

Parliament building tasenba semzükba sentong nung Tir mezüngsemba ajanga Centre sorkari India temzüng alema inyakogo.

"Parliament ya India indang Legislative body tongti lir. Parliament ya Tir den House ana -- Lok Sabha aser Rajya Sabha lir," ta PIL nungji shia lir.

Linük Temzüng kübok Arrla 79 nung ajemdaker PIL nungji yamaji shia lir, Parliament ji Tir aser House ana lir aser Tir ya linük nung mezüngbuba senso lir, Parliament senden ayongzüktsü aser thinentsütsü Tir dak tashi lir.

"Tir ya Parliament nung tongtibangba. Parliament building asütsü atema foundation lung azüngba sentong nung kechiba Tir sendok? Tang ki semzükba sentong nunga Tir mejaok. Sorkari agiba telemteba ya tim masü," ta PIL nung shia lir.

Bodhbarnü Congress, Left aser TMC densema opposition party 19-ia külem sangdong ka ajanga Ato kilonseri Parliament building tasenba semzüktsüba sentong nungji madentsü telemteba agiogo, ta Bodhbarnü metetdakja liasü.



May 25, 2023 nü Shimla nung Himachal Pradesh State Electricity Board (HPSEB) züngsemtemi old pension scheme takhangba agüja longkak aitba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, MONUPII (MAY) 26, 2023

Tanü asüng chirtemsa tajungba

A khidangbo class ter tatidang result adokdang pass ser masü (?) ta sa asüngdang, kechiyong jenjang tajung nung takok angutsüba imlar masü saka anarongdena asüyonga 3rd division nung danga takok ngura, aji agi temulung tasü, kechiyong subject teimbaka English nung agir aser class ter tashi azüng agibo English mangatet, anungji tatidang nung mulungzüng agi tapi agidang langzü. Atangji, English dang masü saka Hindi subject nunga yamaji, aikati, kechi züluar memetet ser tapi agidang langzüa yutsü. Iba amaji kaketshirtem dang masü saka tesayurtem rongnunga aikati English oshi agi sayur ser nung English junga memetet ser sayu, iba jagi parnoka kanga timatem aser tanurtema kanga akoksadaksü. Ajisüaka, tanübo tang amai class 10 aser 12 result adokdang " na pass ser masü ?" ta masü " Na top ten, twenty-i ir mai, kechi division nung pass asü ?" ta asüngdang. Tetezü, tanü asüng chirtemibo takok angutsü bajibo temetet dang saka takokji takok dang masü saka tangar dang nungi tajungba aser temaba takok asütsüla. Iba nükjidong aser teimla nung tanü asüng tanurtem ajaki kanga meranga azünger. Ano, tajung kaji jakliro aser taküm yimya nunga tsüraburtem dang nungibo tanurtemsa tajungba. Tsüraburtembo aika achiajem aser shi azü nung mazüok saka tanü asüng tanurtembo yamaji masü, tanur kar majung agibo teimbaka peisasa azüoka aliba tanurtem lir. Tsüraburtembo aika sentepia maor aser sarasadema masür saka tanü asüng tanurtembo aikati tanela nung pei tsürabur asoshia khuret bentsür. Aji oda, akhi tsüraburtem kaketrejui aobaji azüngtsü aser zülutsü angazüktsü asoshi aoba liasü saka tanü asüngbo azüngtsü aser zülutsü angazüktsü kisüng atemabo school-i aotsü menügdaker, kechiyong itemjibo kidang shia adoker. Anungji, tanü asüng tanurtem kaketshidaki aoba yabo mapa inyaksü angazüki aoer, anungji parnok zünger mapa bushitsü masü saka mapai parnok bushitsü, kechiyong parnokji mapa inyak metettertem asütsü. Item ajakji kaketreju nung tanü putu nung züngtetba tesayur tajungtemi sayuba ajanga alir. Aji oda, taoba 20th century nung government school-tem nung sayur tesayurtem o tanü 21st century nung sayur lanur tesayurtem na tsüngdaji temetemdangtsüla masü. Tanü putu nung sayur tesayurtemjibo tebou mesüra tebu nungertema tazüng temeteter asüba 2nd mesüra 3rd generation chirnurtem asütsü saka yashi tashi sayua aliba tesayurtembo teimbaka pei tebu dena azüng zülü memetet ser aruba mezüng long pants aser tsüngsem semer kaketshidaki aor 1st generation purtem liasü. Item ajangshia aruba mapangtemji kodang bilemdangdir, atangji asenoka joko tangar mesüka nüchi kümer aientsüba mapang ka agi atonger südi ta bilemer. Iba kuli kaji taküm NBSE kübok class 10 aser 12 tatidang nung takok tajung angurtem aika government school-tem nungi liasü. Ibaji Nagaland shia aruba tamaitüsü lir. Iba jagi kari temulung magütsüyongbo tanü asüng lanur tesayurtem aikati pei ataba school nung tanurtem dang kanga temulung agüja sayuba kuli angur. Atangji, government school majungtsüba kuli kecha mali, kechiyong pei pei alidak government school-tem reprangtsü bajiji pei pei yimten nem tashi agüja lir, anungji pei school peii anepalur. Talisa, taküm nungi tenzüker ano government school-tem nung tesayurtemi tali tenendakba aser pei alidak Education Coommittee purtemia temulung tagütsüba inyakra, iba jagi Tsüngremi asenok nem moatsüba tanurtem aika asenoki Pa nükjidong tongteta anepalutsütettsü.

OLEMSABANG

TSÜRABURTEMI CHIRNUR ATEMA KHURET ABENTSÜLA ASER MAPANG PERIA AGÜTSÜTSÜLA

~ L. Kika Pongener.

Tanü putu nung tsürabur aikati chirnur kong lir ? Koda alir ? Kolen senzür ? Medemer tajung den medemer asü tamajung den medemer ? School/College-i shidak aor asü maor ?...ta mebushidangba, oda züba-züba-a kecha khuret mekai aliba tsüraburtem aika lir. Ajiser, chirnur taküm tia teraksatsü ajak raksaa-doker külen sasasete, joko asa-taoi tain kümadoker ano meyiper, chirnurtemi bentsür aruba tebilemtsü khuret agi nen-neter shisabulua timtema aliba kibong aika lir. Iba tamakokji jungjunga bushidangra, aji tanür tai masü tsürabur tai asütsü. Tsüraburtemi chirnurtem mapang shidak nung timi mazüoki zübazüba-a toktsüba agi teimba ka raksadaktsüba asütsü. Tsürabur aikati rongsen dang penpua sen-sen dang bushia, talisa tetsü kati anepdang nungi nikongdang tashi, chirnur nem mapang magütsüi ki toktsür sen bushiba, shishilempaba mapa nung dang temulung ajak agütsür jajaba agi chirnurtem agi taküm tia raksaba aika lir. Ano karbo tanür tila jebang-nubang mapang tetsü ka loktiliba aika nung atongoker, mazüngi lokti mapa atema senzüdang chirnur nem mapang peria magütsü agi raksaba karbo lir. Ano karbo tsürabur anaprongla sorkar mapa inyakba agi chirnurtem 'Mini-Kanja' nem dang toktsüba agi jungnusetta raksaba karbo lir. Ano tesasatsüka, tanür karbo tsüraburtemi senotsü kar ta sur chirnurtemi meshiba/ningdakba dak talila agütsüba agi yilar/mozü lar küma, sen agi taküm tia raksadaktsüba karbo lir. Ano karbo kibong nung apuani tsüngda kati ka hesap nung mali, apuani tsüngda temeim mekongatoker, tenuk tasen adoker lidipudia litepdang (Broken Family) chirnur taküm tia jungnusetta raksadaktsüba karbo lir. Tanü asen lima nung kibongtem atema kanga tekümdangtsü kaji, mozü-lar (Drug Addicted) otsü osang küm ishika ajema toker ayungayunga lia aliba, ano küm ana-asep tsüngda ka nung kanga bulua küma-odagi. Akhidang mangashiba Drug tenung tasen ka 'Sun Flower' achiba otsü osang kanga bulua kümdagi. Anungji tsüraburtem kanga chirapera-a kümdanga meita alitsüla.

Alima nung kibong aser taküm alitsü asoshi sen/rongsenji kanga nungdak aser tongtipang lir, saka ano sen/rongsen kisung agia taküm ya malir. Anungji kibong nung rongsen bushiba luyim dang nungibo, chirnur mapang shidak nung tim tazüoktsü azüoka, tim lenmang nung anitettsü bajiji kanga agi tongtipangba sudaktsütsüla. Kibong aika nung tsüraburtemi chirnurtem dang nungi sen/rongsen bushiba mapaji tongtipangba sudaktsüba agi, sen/rongsenbo aika benden, saka chirnur taküm tiabo kodanga meyanglushitettsüsa raksaa-adokba kibong aika lir. Ajiser, sen/rongsen bendenba ajungato chirnurtemi anak-aoyi küma lalushiponga endokba kibong karbo lir. Anungji chirnur mapang shidak nung azüoka tim lenmang nung anitettsü atema tanür nuboo majung tashi tetsü kati ki toktsür maotsüla, shishilempaba mapa, senotsü bushiba luyim nung kangabo temulung magütsütsüla. Tsürabur ajaki sen/rongsen dang nungi chirnurji tongtipangba sudaktsütsüla. Kibong nung chirnur dang sayu-bentsü o ashitsü mapang tajungtibaji kibong tekülem agiba mapang asütsü, aser kibong nung alir ajak külemi ajuruteptsüba mapang tajungtibaji chiyungba mapang asütsü. Anungji tsüraburi iba mapang nungji chirnur nem mapang agütsütettsüla, kechiyong kibong ya kangasa tongtipanga ta tsürabur ajaki angatettsüla. Tanü putu nung kibong aika kibong masü 'Hotel' dang mesuk, pei chiyungnuba mapang arua chiyungba, tsürabur o chirnur na tejak mongutepi anogo suidaktsüba kibong karbo lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Khristan kentener Danielle-i 'American Idol' nung tanabuba jenjang angu



Americal Idol tetoktepba nung shilem agirtem- Colin Stough, Megan Danielle aser lam Tongi nung noksa nung angur.

May 25, 2023: Khristan osangtajung kentener, Megan Danielle-i "American Idol" season 21 nung tanabuba jenjang nguogo.

Amongnü aonung (May 21) American Idol final sentong ghonda asem agi. Arrshi küm 21, Danielle-i tanabuba jenjang angu aser arrshi küm 18 lam Tongi-i temaba jenjang nung takok ngua recording contract den senpet dollar sen 250,000 angu.

Tongi-i tebu nüngtem nung James Blunt indang "Monsters" ken aten. Tongi tebu ya 2021 küm December ita nung asü. Finale sentong nung Blunt aser Tongi nati

külemi "Monsters" ken aten. Tenaprongla tebu tezüngjang tashidak agi asü.

Tongi ya-a Latter Day Saints indang Church of Jesus Christ nung züngsem lir.

American Idol season piyong Danielle-i lai Khrista dak tamang akaba indang lemsatepa liasü. Audition mapang lai Lauren Daigle indang ken "You Say" tena liasü.

Tetoktepba piyong Danielle-i osangtajung ken aten aser Amongnü aonung finale sentong nunga lai "God Whispered Your Name" ken aser lai mejemba ken "Dream Girl" tena liasü.

Finale jakdang lai

Instagram ajanga, "Ni finale sentong tongtetba ya tang tashi mamangteter. Maangka aika anguba atema ni Nü dang pelar, Yisu," ta lemsatepa liasü.

Danielle ya waitress inyaker aser online ajanga lai la ya Khristan kentener/ken mejemer ka aser lai Yisu temeim lemsateptsü meranger dang, ta zülua lir.

La teboui la dang "Tsüngrem atema ken tennang" ta la ajungshia liasü, ta lai ashi.

American Idol tetoktepba nungsa lai tebou nüngtem nung Vince Gill indang ken "Go Rest High on That Mountain" tena liasü.

Nigeria kübok Imo state nung Khristan aika tepsetogo: Intersociety

May 25, 2023: Africa nung nütsüng teimba aliba Nigeria linük nung meimchir temeden atema inyakba organization kati Imo state nung Khristantem teimba ser civilian aika samaba, ozüng alema pua ayuba aser tepsetba osang tejangja metetdaksüogo.

May 21 nü osangbenertem senden ka nung iba report sayadang Intersociety organization nung chairman, Emeka Umeagbalasi-i, "Tesüiba ita 29 tsüngda (January 2021 nungi May 2023 tashi nung) security sepaitem aser kiralongrartemi Khristantem teimba ser nisung 900 tepsetogo, nisung 700 dak tema yirutsü, nisung 3,500 apu, rakzükraaktemba tatalokba 1,400 liasü aser nisung 300 dak tema samaogo, ta metetdaksü.

Kasa report ajanga, kasa mapang nungji civilian ki 1,200 rongdoktsü, nisung 30,000 talidak ki makai aküm aser nisung 500,000 dak tema jenshiogo, ta metetdaksü.

Fulani jihadists aser tanga telok balalai nisung 700 tepset aser nisung 900 dak tema puer ao, ta kasa report ajanga metetdaksü.

Imo state nung tepsetba nisungtemji teimbaka Khristantem lir, ta report ajanga metetdaksü.

Umeagbalasi-i, "Tamangba yimsü aser kin nung ajemdaker nisungtem tepseter, ajisüaka Nigeria nung police-i ozüng alema inyakba mapatem menokdangteter," ta metetdaksü.

"Onoki police aser security agencies manemer saka parnoki ozüng kübok inyaksüla," ta pai ashi.

Intersociety organization-i, Imo state nung tekülem kitem nungi auyar, synagogues 200 shi aser tekülem ki 300 shi rongdoktsüogo mesüra raksatsüogo, ta metetdaksü.

Umeagbalasi-i, "Nai Muslim nung mashika dang Boko Haram kiralongrar züngsem ta shia tepsettsü makok. Nai mosque ji Boko Haram kiralongrartem training agiba tesem ta shia rongdoktsütsü makok. Khristantemibo kodanga yamaji meinyaker," ta ashi.

April 10 nüa Intersociety-i report ka ajanga, 2009 küm Nigeria nung Islamic kiralongrartem amenokba mapang nungi tenzüka tang

tashi nung Khristan 50,000 dak tema tepsetogo, ta metetdaksü liasü.

Osangbenertem den jembidang Makurdi Arogo nung putir, Remigius Ihyula-i, "Security tsütsü tayongzükba balala atema sorkari junga meinyaker, ta nisung tajung ajaki shitettsü. Küm 8 tsüngda aibelenertem mapu mesüra temerenshi magütsü; iba tetezü tang aliba sorkari ozüng alema inyakba mapatem nokdangtsü tebilemba mali," ta metetdaksü liasü.

May 29, 2023 nü Nigeria nung Tir teinyakdak, Buhari menden nungi anisüngzüktsü aser Tir shima alisang, Bola Tinubu-i office mapa agizüktsü. Ajisüaka Bishops' Conference of South Africa indang Denis Hurley Peace Institute (DHPI) nung Director, Johan Viljoen-i, "Tir tasen süaka temelenshi kecha malitsü," ta ashi.

Imo state densema Nigeria tesem aika nung Khristantem jenti tepsetba anema Intersociety-i International criminal investigation telok ka dang Imo state nung meimchir temeden balala anema inyakba bushisüngdangtsü mepishio.

ANOGO ABEN TSÜNGREM DEN

Alima shisa shir dang nungi parnok shisa takaba liasü

Item shisatsü balaka liasü.

Tsüngremer shisa taka nisungji alima shisatsü nisung dang nungi balaka. Parnok nungi petinu samar külen, shisa kartemi tasen chuba indang kong soa lir tali asüngdangtsü mulungtet. Atangji parnok dang tasen Chubaji Yirusalem angutsü ta shir alitsü. "Yihuda nung Chubaji kong soa lir," ta asüngdanga parnok aru (Matt. 2:2).

Yirusalem nung alir ajaki tasen chubaji külemya alitsü ta parnoki bilemer alitsü südi. Saka yamaji masü liasü. Kodang Herodi iba osang angashi pa tipmatem (Matt. 2:3).

Yirusalem nung alir shingaia Messiah asobaji bilema mali asü. Kodang Herodi putirtemi dang tasen chubaji kong asotsüla ta asüngdang, parnoki Laishiba nung bushitsü tenzük. Tejen Lai nung yimsü nung tesayurtemi Khristaji Yihuda nung aliba Bethlehem nung asotsü ta ratettsü (Matt. 2:5).

Saka item shia akartemi shitakba telangzübaji agütsü, yimsü nung lenirtemi parnok temetetba liaka parnoki kodanga Yisu majuru. Tezülurtem aser putirtemji alima shisa akartem noksa lir. Parnok metet saka kecha meinyak! Anüdoklen nungi aruba nisungtemji shidakba Tsüngrem shisatsü akartem liasü. Parnoki Pa O amang aser langka inyak. Parnoki iba jagi mapa inyak. Parnok theologyji teradang, saka parnok tashi angabaji tabensa liasü. Laishibai ashir, petinu tesangwaji kong Yisu soa lir ibaji matong tashi parnok jakdang ao (Matt. 2:9). Tsüngremi parnok Kinü Khrista dangi ani. Kotaker shisatsüji teti alima shisatsü dang nungi temaba.

Tsüngrem tenzüker Rev.T.Sübong alima nungi pilaogo



Rev T.Subong den asüpila sentep sentong agitsü atema Ao Baptist Arogo Diphupar nung deacon-temi pa temang apur tenla kidangi atuba noksa nung angur. (Diphupar, May 25,2023.)

Dimapur, May 25 (TYO) : Kangching Baptist Arogo nung Kohima Ao Baptist Arogo nung 1954-1961, Longleng Town taoba sannüker Rev.T.Sübong Baptist Arogo nung 1962-1971 mapang kenpiga temang aser tesüsa KABA nung 1972 menjungi arur yashi May 24 nü nungi 2004 küm tashi inyaka alima nungi pilaogo. Pa arishi küm 90 liasü.

Tanü pa den asüpila sarasadem mapang ka Pa ya akhidang Eastern Theological College nung Diphupar nung par kidang Intermediate Bible Study nung Molungyimsen Fellowship Diploma anguba laishir ka liasü. Dimapur purtemi ketdangsia agiba sülen Ao Baptist Arogo kum 56 bo arogo balala nung Diphupar-i parnok tenla kidang asüpila sentep tajung ka lia inyaka liasü. Pa mezüng meinoktsüogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Rajenpujen

(n) Kin kidong razüka arubalen (genealogy)

* Asenok nisung shiai pei **rajenpujen** meteta alitsüla.

Raktang

(v) Tokdang (break apart)

* Ni mapa inykdang azüklen süng ka **raktanger** tsük.

OLONG PAITEP # 6526

1		2		3		4		5
			6		7			
8								
					9			
		10						
11								12
				13		14		
15								
16						17		

TIPLIN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6525 TELANGZÜBA


TIPLIN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**Agüja aliba noksa nung meputepi
aliba 5 bushiang**



Happy Birthday

TENÜNG - LYDIA PONGEN

- Tasoba Anogo - 26-05-15
- Küm - 8
- Class - 2
- School - Carewell School
- Talidak - 103 Kashiram, Dimapur

Lydia küm 8 tashi Tsüngremer temoatsü, taküm nung nungdkakba ajak tajungtiba agütsü nung teyanglur tenüng asanger. Tang nungi tashi angaba, Tsüngrem aküm tsübubata taküm ka lidakjang, aser arishi talang moajangma ta sarasademer.

- Temiem Apa, Mummy, Molungti, Oko Jilo, Monglong, Akhusa aser Otsu.



KHONANG TETUSHI AGÜTSÜR

Mr. Imlinukshi aser Mrs. Imsünungla dena jala **MISS. MOLONGNENLA-i** The National Institute of Technology, Nagaland, Chümoukedima nungi Physics nung Doctor of Philosophy ngutetba asoshi Changtongya Town Changtongya Yimsentsür Telongjemi tetushi agütsür.

Tsüngremi ne wadang tali moajang.

**Sd/-
Mrs. Arenla
President**

**Sd/-
Mrs. Watila
G. Secretary**



Amit Shah-i yakta Manipur semdangtsü

Guwahati, Monupii/May 25 (Agencies): Union home minister Amit Shah-i, mepetmesü adoker aliba Manipur state ya yakta semdangtsü, ta metetdaksüogo.

Guwahati, Assam nung Srimanta Sankardev Kalakhetra sentong ka nung o jembiba mapang Amit Shah-i iba osang ya metetdakja liasü.

"Ni Manipur semdangtsü aser idakji anogo asem amungtsü," ta Union home minister Amit Shah-i ashi.

Sentong nung o jembiba mapangsa Amit Shah-i, Manipur

nung mepetmesü agi kongshir alirtem ajak nem ochi obendang agütsütsü, ta ashi.

"Azütokshi lendong tulu atalokba nung densema alirtem ka danga metoktsütsü," ta pai Brehostibarnü ashi.

Amit Shah-i ashiba agi, pai Manipur semdangba mapang stakeholder ajak den sensak asemtsü.

Union home minister-isa, "Manipur nung BJP-i sorkar kümteter küm trok tsüngda tang mezüngbuba iba amala mepetmesü tulu ya atalokogo," ta ashi.

Iba mepetmesü nung Centre aser Manipur nung BJP sorkar medensemdaksütsü meranga Amit Shah-i, mepetmesü ya okadak obendang ka agütsüba ajanga adokba lir, ta ashi.

"Ni Manipur nung aliba nübürtem dang yimjung nung alitsü mepeshir," ta pai ashi.

Paisa, "tebilemtsü ajak ya sensaksem ajanga bentettsü koka lir," ta ashi.

Temetettsü kaji, Manipur nungi Biren Singh nongita yariba MLA 15 tashi Brehostibarnü Amit Shah den ajuruteptsü asoshi Guwahati nung mungzüka liasü.

Meghalaya: KHADC-i non-local taxi anishirtem trade license asadang

Shillong, Monupii/May 25 (Agencies): Taxi Drivers' Association-i mepeshiba sülen Khasi Hills Autonomous District Council (KHADC)-i, Meghalaya yimtiba Shillong nung non-local taxi anishirtem indang trading license asadanga liasü.

License asadanga sentong ya Brehostibarnü 11:00 ako nung Mawprem Taxi Stand nungi tenzük aser yimti kübok Motphran, MUDA Parking Lot, Luckier Road, Laitumkhrah, Dhankheti, Malki, Barik, Polo, Golfink, Nongmensong, Nongthymmai, Rynjah, Madanrting, Happy Valley, Mawlong Hat, Khlieh Iewduh, aser Jhalupara Taxi Stand tem nung asadanyonga ao.

May 18 nikongtsütsü local taxi anishir ana mejangjaba nisungtem azükba sülen license asadangtsü asoshi takhangba ya agüja liasü. Iba tatalokba sülen East Khasi Hills Taxi Drivers' Association-i

KHADC dang jenjang tapet agia yimti kübok non-local taxi anishirtem indang trading license tem asadangtsü asoshi mepeshia liasü.

Iba sentong ya trading license regulation sülen anidakdaksütsü aser non-local taxi anishirtem inyakyim meshidakba nung densema aliba jangjatsü nükjidong nung ayongzüka agiogo.

East Khasi Hills Local Taxi Welfare Association (EKHLTWA)-i taoba mapang parnoki Shillong yimti nung non-local taxi anishirtem magizüktsü ta sangdonga liasü. Khyndailad nung lendong ataloka police-i nisung pongu tashi apuba sülen ghonda ishika dang lir iba telemtetba ya agia liasü.

Khyndailad nung lokti senden ka nung o jembiba mapang EKHLTWA tir Wandonbok Jyrwa-i, "onok tang SP office nungi arur aser pai iba lendong nung densema

alirtem puogo ta shiogo. Ketdangsurtemi onok takhangba ataloktsüba atema pelar," ta ashi.

Osang ajanga ashiba agi, association general secretary Lakhmen Rymbai-i, sentepa aliba lokti dang parnokia non-local taxi anishirtem nem yimti nung maneni taxi anishidaksütsü mulunger memulunger ta asüngdanga laisü aser lokti-i parnok nem taxi manishidaksütsü mulunga aliba lemsatapa liasü.

"Shirnoki onok medemertem dak zükogo, parnoki temang anepaluba mapang intokba sen aotsüla," ta Rymbai-i ashi.

EKHLTWA-i, sorkar dang yimti nung ozüng alema inyaksangshiba non-local taxi anishirtem anema jenjang tapet agitsü asoshi khanga aruogo.

Association-isa, non-local taxi anishirtem-i para tali meshiba indanga ashishia aruogo.



Arunachal Pradesh nung assembly elections agitsü küm ka majung lia Nationalist People's Party (NPP)-i Mongulbarnü Longding General Ground nung political rally tulu ka ayonga agidang tangokba noksa angur. Iba sentong nung NPP Arunachal Pradesh president Thangwang Wangham, General Secretary (Organization) Paknge Bage, Secretary Tapi Sorang, NPP State Unit Youth President Damboy Ropuk, taoba minister Hejam Ponglaham aser state o district levels nung lennir aika aden. (Longding, May 24)

Russian army nem Bakhmut agütsü tenzükogo: Wagner

Moscow, Monupii/May 25 (Agencies): Russia nung sen yong raraba Wagner telok tekolakbai par sepaitem Ukraine indang Bakhmut yimti nungi ainshi tenzükogo ta sangdong.

Yevgeny Prigozhin-i iba yimti ya Russian army nem June 1 tashinung amoktsütsü nangzüka liasü, saka yimti nung tesem kar par kübok lir ta Kyiv-i ashir.

Russian army temi tensa mazuoktetra meyiba shilangtsü renema lir, ta pai ashi.

Ukraine nung rara tenzükür iba yimti agütsü asoshi raraba ya talangtiba aser tesashitaba liasü.

Iba timti nung Wagner mercenaries temi Russia atema raraja liasü aser Bakhmut nung par sepaitem 20,000 süogo ta

Prigozhin-i tan hopta ashi.

"Tano Bakhmut nungi ozü unit tem ainshir," ta Prigozhin-i raksatsür aliba yimti nungi Telegram nung video ka sayaba nung ashi.

Iba video ya Bakhmut anüdoklen pharmacy ka anasa nungi tangokba lir ta BBC-i jangjateta liasü.

Iba yimti Honibarnü atsüngdokogo ta sangdongsang Prigozhin-i par nisung dang injang tem Russian army nem yutsütsü shia liasü. Russian sepaitem yaritsü atema Wagner fighter kar yangi alitsü, ta pai ashi.

"Mitkartem tensa tamajung ajurua alidang parnok nokdaksü," ta pai ashi aser par

sepaitem mitkar memesüshitsü shia liasü.

Wagner tekolakbai Russian mitkar ketdangsür aiben aija aru aser par sepaitem meyarir ta yimjak nung aitsü. Parnoki nungdakba injang-bomb magütsüra par sepaitem yimti nungi anizükür aotsü ta pai taoba ita amokmeren.

Wagner-i Bakhmut ya Russian mitkar nem amoktsür ta shiaka Ukraine-i yimti ya ano melao ta ashir.

Ukraine indang Deputy Defence Minister, Hanna Maliar-i Brehostibarnü ashiba agi, yimti southwest tsütsü Litak district tang tashi par sepaitem kübok lir.

(Maneni tapak 8 nung...)



Office of the
DIMAPUR LONGPATSÜR TELONGJEM

Dimapur : Nagaland

"Tanüla aser Sobaliba nung Aintsü Asoshi"

TENÜNGSANG AGÜTSÜR



Dimapur Longpatsür Telongjem ajanga **Ms. W. Aotula Ozüküm**, Mr. Watimeren Ozüküm aser Mrs. Kining jala UPSC tatidang nung tematiba jenjang nung takok anguba asoshi tepela aser tenüngsang tetushi agütsür. Nübor tenzükba mapa nung takok nung inyaksü arishi anema aliba taküm Tsüngremi moajangma.

Maneni HSLC aser HSSLC nung Longpa chirtem shirnoki takok nguogo ajak dang pelar aser tenüngsang agütsür. Tsüngremi nenok moajangma.

Sd/-

Mrs. Ayangla Lemtur
President

Sd/-

Mrs. Imnaienla Nokdy
Secretary



Office of the

TULI COLLEGE

Borbora Ward, Tuli : 798618

P.O: Tuli, Mokokchung, Nagaland

ADMISSION NOTICE

Admission into BA 1st Semester will commence from 25th May 2023.

Courses offered:

Three Years Undergraduate Major Programme:

English, Education, Political Science, Sociology, History Economics

Additional Courses: Computer Courses in Partnership with NIELIT:

Time Duration	Course
2 Months	Course on Computer Concepts (CCC)
4 Months	Computer Fundamentals and Financial Accounting and Book Keeping
6 Months	Computer Application and Networking (CAN)

Prospectus and Admission forms will be issued from the office of the Principal Tuli College from 25th May 2023.

* Regular Classes for BA 1st Semester will commence from 20th June 2023.

For details contact : 8787376916 / 7005541853

Sd/-
Principal Tuli

TENÜNGSANG AGÜTSÜR



Longpa yim nungi Solomon Ozüküm semchir **Kr. Aotula Ozüküm**, Wb.T. Watimeren Ozüküm aser kinungtsü Wt. Kining na jala Union Public Service Commission (UPSC) Civil Service tatidang nung takok tulu anguba asoshi la nem konang nüngsang agütsür.

Tarutsü nunga la mapa aser nübor tenzükba wadang nung Tsüngremi maneni moajangma ta Solomon semchir ajak sarasadem.

- Solomon Ozüküm Semchir, Longpa.



Livingstone
Foundation
International
College

Courses offered

(Certificate, Diploma, Degree, Honours, Degree with research)

ARTS:

- English
- History
- Political Science
- Education
- Psychology

COMMERCE:

- B.Com Honours

SKILL ENHANCEMENT COURSES and VALUE BASED COURSES as per NEP 2020.

OTHER CERTIFICATION COURSES:

- Hospitality
- Art & Crafts
- Music
- Culinary Skills
- Driving Lessons
- NCC and more!

an institute where progressive education & skills converge through holistic approach

why choose us?

- ✓ Excellent infrastructure for all kinds of indoor/outdoor activities.
- ✓ Professionally trained, qualified and committed faculty.
- ✓ Activity-based learning and exposure to seminars, workshops & educational tours.
- ✓ Special scholarships and concessions:
 - 100% concession in the 1st Semester (for top 20 rank holders from NBSE or 90% above from CBSE and other boards)
 - 50% off 1st semester fees for students excelling in Sports, Arts, Music, and more.
 - 50% concession for LFIS students of both streams in the 1st Semester fees.



LIVINGSTONE
FOUNDATION
INTERNATIONAL

THAHEKHU / KEVIJAU,
DIMAPUR - 797112
NAGALAND

2023
ADMISSION
OPEN NOW
FOR GRADE - XI

- ARTS
- COMMERCE
- SCIENCE

UNIQUE FEATURES OF LFI

- Football Coaching by Dimapur Football Club
- Music Lessons by Musik-A (Alobo Naga & Team)
- Zumba Fitness Classes by PAWF Nagaland
- Martial Art by Nagaland Pensak Silat
- Art & Calligraphy by Wandering Minds
- Horse Riding (Equestrian & Jockeying)
- Spacious AC Hostel for both Boys & Girls.

JOIN US ON SOCIAL MEDIA

- livingstone.nagalang@gmail.com
- livingstonenagalang.com
- livingstonenagalang

"YOUR
KIDS
OUR
PRIDE"

ENROL
NOW

WHEN YOUR CHILD'S
FOUNDATION IS STRONG,
THEY ARE PREPARED TO
FACE THE WORLD

- Forms available between 9:00am and 2:00pm at the LFI Accounts Section.
- 100% Concession for Grade-XI in both Hostel & School Fees will be granted to Top 20 Rankers from recognized Boards.
- 25% Concession for Grade-XI in both Hostel & School Fees will also be granted to students with excellent flair in Sports, Art, Music & other such skills.

"WE BELIEVE IN ALL ROUND
& HOLISTIC DEVELOPMENT
OF A CHILD"

CONNECT WITH US

03862-244203/244302
+917005996092 / 93

CONTACT US:

- 03862 244302 / +91 88372 81839
- livingstone.nagalang@gmail.com
- livingstonenagalang.com/college

Thahekhü, Kevijä-ü,
Dimapur - 797112, Nagaland

Senior men's Inter-district asayamung anogo 4buba osang



Dimapur, Monupii/May 25 (TYO): Brehostibarnü Nagaland Cricket Stadium nung mezüngbuba asaya Niuland aser Phek na asayaogo. Mezüing batting amenba sülen Niuland team-i over 30 nung asayar 4 out ser run 282 yanglua liasü, koba tang tashi nung iba asayamung nung team kati run tímiba yangluba asütsü.

Niuland team atema Afzal Hussain (run 20), Vishal Sahani (32) aser Wahid Ali (63) nungeri asaya kanga junga tenzütsü, ajisüaka Hokaito Zhimomi-i out mesüi ball 77 nung run 122 yangluba ajanga team jenjang kanga junga kümdaktsü. Pai boundaries (4s) 17 aser six ana zükaliasü.

Phek team atema captain Lawrence Vero-i wicket ana agi aser Deto Rhakho-ia wicket ka agia liasü.

Asaya akoktsü atema run 283 nüngdaka asaya tanabuba shilem tenzükbaba sülen Phek team-i over 21.4 nung asayar ajak out ser run 75 dang yangluteta asaya run 207 agi makok. Parnok rongnungi Deto Rhakho-i (run 23) dang tera junga asaya liasü. Niuland team

atema Vino G Zhimomi-i wicket 4 agi aser Akavi A Yeptho aser Anil Gupta nati wicket anana agia liasü.

Iba asaya atema Hokaito Zhimomi nem man of the match naroküm agüja liasü.

NCS nung tanabuba asaya Kohima aser Longleng na asaya koba Kohima-i wicket 2 agi koka liasü.

Toss akokba sülen Longleng-i mezüing bat asütsü shim aser over 24.4 nung asayar ajak out ser run 92 yanglu. Longleng team atema Moakumzuk-i run 18, Watimeren 10, Mungkham 23, Arjun Kumar Yadav 10 aser Chingnung-i run 15 yanglua liasü.

Kohima team bowler tem rongnungi Sepichem aser Kelhousilie nati wicket asemsem agi, Samuel Zaputou-i wicket 2 aser Khriesavituo o Seyievizo nati wicket kaka agia liasü.

Asaya tanabuba shilem nung Kohima team nung Imomenba Walling-i maneni junga asaya run 21 yanglu aser pa indang opening batting partner Hemavi Aye-ia run 16 yanglua liasü. Ajisüak asaya tatemlen

Khriesavituo Solo-i out mesüi run 6 aser Thejasetuo Solo-i out mesüi run 8 yangluba ajanga Kohima team nem takok agütsüogo. Kohima team Semi-finals atema qualify asütsü masütsü aji Hokolbarnü Longleng aser Wokha na asayaba sülen jangjatsü.

Asaya atema Kelhousilie nem man of the match award agütsü.

Kasa mapang nung Sovima Cricket Ground nung Brehostibarnü mezüingbuba asaya Wokha aser Mon na asaya liasü. Mezüing bat asütsü shimba sülen Wokha team-i over 30 nung asayar 9 out ser run 150 yanglua liasü. Parnok rongnungi Nzanthung Mozhui-i run 13 runs, Renjamo Y Mozhui-i 36, Rendemo Mozhui-i 38 aser Nchumbemo Kiko-i run 19 yanglua liasü. Mon team atema Chingkap Konyak-i wicket 7 agia liasü.

Run arishiba mapang Mon team-i asaya junga metenzük aser top order batsman asem kanga kar out süatok, ajisüaka Shamwang Wangnao-i run 64 aser Ahon Konyak-i run 29 yanglua team nem teyari

agütsü. Iba sülen Phaknyu Konyak-ia run 14 yanglu ajisüaka parnoki Wokha-i yanglur aliba run memenep aser asaya wicket 5 agi makok. Wokha team bowler tem rongnungi Renchio Odyuo aser Romokhon Humtsoe nati wicket anana agi aser Bonthungo Murry o Sulanthung Kithan nati wicket kaka agia liasü.

Renchio Odyuo nem man of the match naroküm agütsü.

SCG nung tanabuba asayaba mapang Dimapur-i toss akok aser mezüing bat amentsü shim. Parnoki run 191 yanglua liasü. Dimapur team batsmen tem rongnungi Shamphri Terang-i run 37, Joshua Ben Ozukum-i 30, Hem Bahadur Chetri-i 44, Temjentoshi Jamir-i 21, Tohuka Zhimo-i 24 aser Santosh Mahato-i run 15 yanglu.

Tsemenyu team atema Nuntilo-i maneni kanga junga asaya wicket 3 agi aser Ntsenlo, Henry aser Monu nungeri

wicket anana agi over 24.1 nung Dimapur nungi asayartem ajak out sütsü.

Run arishiba mapang Tseminyu team-i over 30 nung run 125 dang yangluteta asaya makok. Parnok rongnungi Potouzo Kent (43) aser Kepesilie Kent (23) nati tajungba asaya liasü.

Dimapur team bowler tem rongnungi Tohuka Zhimo-i wicket 2, Renben aser Santosh nati kaka agia liasü. Dimapur-i iba asaya akokba sülen Niuland team Semi-finals atema qualify süogo.

Asaya atema man of the match naroküm Tohuka Zhimo nem agütsü.

May 26 nü asayar:

Nagaland Cricket Stadium 8:00 ako : Chumoukedima vs Peren

12:30 ako: Mokochung vs Kiphire

Sovima Cricket Ground 8:00 ako: Wokha vs Longleng.

Asian Cup Qualifiers: India team UAE, Maldives, China den ataogo

Monupii/May 25, 2023

(Agencies): AFC U-23 Asian Cup Qatar 2024 Qualifiers nung India U-23 men's football team Group G nung United Arab Emirates, Maldives aser China den ata lir. Iba asayamung atema Brehostibarnü Asian Football Confederation (AFC) House nung draw süa liasü.

Group G Qualifiers ya China nung September 6 nungi 12 tashi asayatsü. Iba asayamung nung India team September 6 nü Maldives den asayatsü aser iba sülen September 9 nü China PR aser September 12 nü United Arab Emirates den asayatsü.

Group A Qualifiers ya September 4 nungi 12 tashi Jordan nung asayatsü aser Group B asaya Korea Republic nung asayatsü.

Maneni Group C qualifier Vietnam nung, Group D qualifier Bahrain nung, Group E qualifier Uzbekistan nung, Group F qualifier Kuwait nung, Group H Thailand nung, Group I Tajikistan nung, Group J Saudi Arabia nung aser Group K qualifier Indonesia nung asayatsü.

AFC U23 ASIAN CUP

QATAR 2024

QUALIFIERS DRAW

RESULT :

Group A: Jordan (H), Syria, Oman, Brunei Darussalam

Group B: Korea Republic (H), Myanmar, Krygyz Republic, Qatar

Group C: Vietnam (H), Singapore, Yemen, Guam

Group D: Japan, Bahrain (H),

Palestine, Pakistan

Group E: Uzbekistan (H), IR Iran, Hong Kong, Afghanistan

Group F: Iraq, Kuwait (H), Timor Leste, Macau

Group G: UAE, India, Maldives, China PR (H)

Group H: Thailand (H), Malaysia, Bangladesh, Philippines

Group I: Australia, Tajikistan (H), Laos, DPR Korea

Group J: Saudi Arabia (H), Cambodia, Lebanon, Mongolia

Group K: Turkmenistan, Indonesia (H), Chinese Taipei.

Draw nung team 43 ya team pezüzü keter telok ter aser team asem keter telok ka ta lemsatsüogo. Telok ajak ya tesem ka nung dang single round-robin format nung asayatsü aser group 11 nung takok angurtem aser tanabuba jenjang nung tembangba team tajungtiba pezü AFC U-23 Asian Cup Qatar 2024 atema qualify asütsü.

Iba asayamung atema Qatar bo qualify süatokogo, kechiyong nung team 16, 2024 küm April 15 nungi May 3 nü tashi asayatsü.

AFC U-23 Asian Cup Qatar ya Paris 2024 atema men's Olympic football tournament qualifier asütsü. AFC representatives ama temaba jenjang nung tembangba team asem Olympic Games atema qualify asütsü aser pezübuba nung tembangba team AFC-CAF Play-off nung asayatsü.

Russian army nem Bakhmut agütsü...

"Yimti nung tsükchir temi Wagner units tem 'regular army troops' temi melenogo. Jila telung nung Wagner sepaitem tang tashi lir," ta lai Telegram nung post sütsü.

Bakhmut ya Moscow asoshi kanga tongtipangbo masü saka iba yimti akokba ya tang tashinung Ukraine nung rara talangtiba raraba nung tenüing tajung ka asütsü, ta teshisadanger temi ashir.

Wagner sepaitemi ita aika iba yimti nung temolung agütsür rara aru aser parnoki tanen makai takoksa jenti ajurua nisung aika yokba ajanga Kyiv tekong meranga nokdakba samaa ao amai ajiteter.

February 2022 nungi tenzüka Russia-i tashi ajak amshia Ukraine amakba nung Prigozhin ya tongti shilem agir

ka akum, shiba sen yong raraba nija army indang tekolakba lir.

Mapa tamajung inyakba yong tepuokdak yua alir meyirijang aika par telok asoshi pai shima liasü aser mapa kangasa tamajung inyaka liaka Ukraine nung Wagner atema raratsü molunger ajak pai shim.

Ukraine anüdoklen Bakhmut yimti rakzüksü asoshi ita aika rara arudang ozü telok nungi nisung 20,000 shi takum samaogo, ta Prigozhin-i ashi.

Ukraine nung Wagner den külemi Russia asoshi raratsü atema tepuokdak alir nisung 50,000 shi shim, ta pai shia liasü aser item rongnung shilem 20 shi tepsetogo.

Bakhmut atema raradang Russian sepa 20,000 dak tema

(Tapak 7 nungi...)

tepseter alitsü aser ano 80,000 shi yirur alitsü ta ita tetenzüklen US-i shia liasü.

Bakhmut rakzükbaba ajanga Russia-i Donetsk region ajanga azüoktsü merangba nükjiong anasai arur, koba Russia-i taoba küm referendum agia rakzükbaba Ukraine eastern aser southern tsütsü region pezü rongnung ka lir.

Ajisüaka taoba küm meyi mapang Severodonetsk aser Lysychansk yimtitem agitsü asoshi Russia-i kanga sashia raradang Ukraine-i dangalen kanga kera tesem aika tanaben agia liasü.

Rara metenzükdang Bakhmut nung nisung 70,000 shi liasü, saka tangbo nisung meyirijang ishika dang anünga lir, koba mapang ka metsü aser gypsum mines aser yi yangluba nung nüngtugu liasü.

BILEMDANGANG

"Ajemalurtemi alima senmang amangtsü."